

Tinjauan: Harmoni kaum dan agama Singapura terus baik

Adli Yashir Kuchit

Berita Harian, 19 July 2013

KEHARMONIAN kaum dan agama di Singapura kekal baik, dengan kebanyakan kaum minoriti berasa mereka tidak didiskriminasi di negara ini.

Demikian dapatan kajian Penunjuk Keharmonian Kaum dan Agama yang dijalankan bersama Institut Pengajian Dasar (IPS), Universiti Nasional Singapura (NUS), dan OnePeople.sg, badan nasional bagi memupuk keharmonian kaum.

Kajian itu menunjukkan beberapa petanda positif bahawa hubungan antara kaum dan agama di sini masih baik.

Umpamanya, hanya satu daripada 10 anggota kaum minoriti Melayu atau India yang ditinjau berasa mereka mendapat layanan kurang baik berbanding kaum lain semasa menggunakan perkhidmatan awam seperti membuat laporan polis, mendapatkan bantuan kewangan atau di mahkamah.

Begitu juga, hanya dua daripada 10 orang Melayu atau India berkata mereka sering merasakan didiskriminasi di tempat kerja, sama ada ketika bertugas, memohon pekerjaan atau penilaian kenaikan pangkat.

Sebahagian besar penduduk yang ditinjau juga mendapati tiada ketegangan antara penduduk berbilang kaum dan agama di sini.

Namun, masih ada jurang yang boleh diperbaiki, contohnya, sebilangan besar penduduk lebih selesa bergaul dengan teman daripada kaum atau agama sendiri.

Mengumumkan dapatan kajian dalam satu sidang media di bangunan OnePeople.sg di Toa Payoh semalam, pengerusi badan itu, Encik Zainudin Nordin, berkata: "Antara petanda positif ialah sebilangan besar penduduk minoriti berasa tiada diskriminasi terhadap diri mereka semasa mereka menggunakan perkhidmatan awam.

"Petanda ini menunjukkan dasar awam Singapura telah berhasil memastikan semua kaum boleh menikmati layanan sama apabila menggunakan perkhidmat awam."

Kajian peringkat nasional yang mengambil masa sekitar setahun itu menemu ramah 4,131 warga dan Penduduk Tetap (PR) Singapura berusia 18 tahun ke atas.

Daripada bilangan itu, 1,736 ialah daripada kaum minoriti Melayu dan India.

Menjelaskan kepentingan sampel minoriti dalam kajian itu, Zamil Penyelidik IPS, Dr Matthew Matthews, berkata pandangan kumpulan minoriti diambil kira semasa menyelidik isu-isu yang menjejaskan kaum berkenaan.

"Sebagai contoh, soalan berkaitan isu diskriminasi, kami hanya ajukan kepada golongan minoriti," kata beliau.

Beberapa petanda positif lain termasuk sebilangan besar responden berasa tiada ketegangan antara kaum dan agama di sini dan sebahagian besar juga melahirkan kesediaan menerima perbezaan kaum dan agama.

Ramai juga berasa selesa bersama penduduk berbilang kaum dan agama lain di ruang awam mahupun privet.

Encik Zainudin, yang juga Anggota Parlimen GRC Bishan-Toa Payoh, berkata biarpun landskap hubungan antara kaum di sini baik, ada beberapa keprihatinan yang perlu ditangani.

Sebagai contoh, salah satu penunjuk rendah ialah keinginan meningkatkan kefahaman dan interaksi antara agama.

Penunjuk paling rendah ialah penduduk Singapura lebih selesa berkawan rapat dengan teman seagama atau sekaum.

Mengulas tentang dapatan itu, Encik Zainudin berkata: "Ia menunjukkan kita masih mempunyai ruang untuk menyediakan peluang berinteraksi antara kaum dan agama."